

陶雲汀先生奏疏

奏疏卷三十七目錄

江督稿

安化陶

勘明場竈被災籲請分別賑緩摺子

恭報回省日期摺片

巡江守備官兵遭風淹斃請照例卹賞摺子

請酌畱熟田漕米以資濟放摺子

蕭縣龍山河宿州西流河挑挖完竣併請鼓勵

出力各員摺子

淮南鹽務各口岸場地情形摺片

江揚各屬成災五分以上籲請一體緩徵摺子

續籌協撥賑需銀兩摺子

上元等州縣衛來春應請接濟摺子

知州因公墜馬身故請卹摺片

通泰海所屬被水各場籲請展賑摺子

覆奏條陳鹽務仍守成法摺子

淮北請試行票鹽摺片

江西贛州請試行設廠收稅併畱委員摺片

勘明場竈被災額請分別賑緩摺子

奏爲勘明場竈被災情形恭懇

聖恩分別給賑蠲緩以普

皇仁而紓竈力事竊照通州分司所屬豐利掘港石  
港金沙呂四餘東餘西角斜拼茶九場坐落通  
州如皋東臺三州縣境內貼近海灘本年七月  
猝被暴風驟雨潮水湧起草蕩被淹又泰州分  
司所屬富安安豐梁垛東臺何垛丁溪草堰劉  
莊伍祐新興廟灣十一場坐落東臺興化鹽城  
阜寧四縣境內接近海濱地勢本低本年五月

後連遇大雨兼之洪湖泛漲運河開放車邏壩  
高郵境內馬棚灣漫溢西水下注復值海潮頂  
托各場埕蕩皆被淹浸又海州分司所屬板浦  
中正臨興三場坐落海州境內低窪之區因入  
夏後大雨時行東省蒙沂山水下注加以海潮  
擎托各河水勢泛漲各場池蕩間多被淹節據  
該分司大使先後稟報經臣批飭運司委員馳  
往會勘查明被災場竈煎丁情形併

奏請動撥鹽義倉穀散布俾資救卹欽奉

諭旨允行在案茲據署兩淮鹽運使俞德淵常鎮道

張岳崧護理淮揚道王貽象護理淮海道王廷  
彥會詳稱據候補知事紀樹庭會同通州分司  
運判章復文稟稱前赴各場勘得豐利掘港石  
港金沙呂四餘東角斜拼茶八場七月下旬風  
潮湧發竈埭間有淹漫旋即消退情形甚輕內  
惟呂四場呂復新沙之東沙係該場一隅中之  
一隅間有淹斃人口經該分司等捐銀撫卹俱  
已復業毋庸虞失所以上各場均請毋庸查辦其  
餘西一場督同該場大使王佩琮詣勘除范公  
堤內古熟田蕩竝未被水成災外惟堤外新墜

淤蕩地本沿海極低七月間猝被風潮淹漫現  
雖涸出蕩草雜糧收成不免歉薄係屬勘不成  
災又據試用知事張雲試用大使陳向離候補  
知事紀樹庭會同泰州分司運判朱沅稟稱勘  
得富安安豐梁垛東臺何垛五場自五月後大  
雨時行鼃河漫溢嗣因西水下注民河陡長富  
安安豐梁垛三場范堤之西鼃地先行被淹迨  
水由范堤低處漫入鼃河該五場堤東埭蕩已  
有積水又於七月下旬風雨交作古熟田畝所  
種秋禾雜糧均多受傷蕩草被水日久長發稀

短埭蕩淹漫竈丁停煎該五場情形相同勘實  
成災五分又丁溪草堰劉莊伍祐新興廟灣六  
場隸泰州之北地勢更低自五月後連得大雨  
埭蕩積水已深又值西水下注加以東北大風  
海潮頂托消導更難以致漫溢竈地秋禾蕩草  
收成無幾竈丁束手停煎該六場情形相等被  
淹較重勘實成災九分等情又據候補知事徐  
毓杰署海州分司運判張若鏞稟稱會同各場  
大使逐疇履勘緣板浦中正臨興三場坐落海  
州東南西南二鄉地勢極窪本年入夏後大雨



連綿東省蒙沂山水下注駱馬六塘等湖河漚  
歸場境兼以海潮擎托場潁各河水勢泛漲以  
致池蕩半被淹浸池頭灘角所種秋禾襍糧均  
收成歉薄係屬勘不成災等情以上各場應請  
循例分別蠲緩給賑由司會詳請

奏前來臣查定例成災九分者蠲免錢糧十分之  
六極貧給賑三個月次貧給賑兩個月成災五  
分者蠲免錢糧十分之一其蠲剩錢糧分年帶  
徵歷經循辦在案本年江蘇省雨水成災所有  
淮南之通州泰州淮北之海州各場竈或因湖

河漫溢或因山水灌注兼以海潮頂漾致受淹  
浸所有被水情形已據該司道督同場委各員  
查勘明確所有成災九分泰州分司所屬之丁  
溪草堰劉莊伍祐新興廟灣等六場仰懇

天恩俯准按照災分查明極貧次貧戶口分別給賑  
折色散放併將該六場同成災五分之富安安  
豐梁垛東臺河垛等五場本年應徵折價錢糧  
按分蠲免蠲剩錢糧照例緩至次年麥熟後按  
照災分分年帶徵次年應徵新賦緩至秋後徵  
收本年應帶徵各年舊欠折價未完竈借口糧

均請仍照原展分帶原案按年遞緩其勘不成  
災通州分司所屬之餘西一場海州分司所屬  
之板浦中正臨興等三場應一併請

旨將本年應徵折價錢糧照例緩至次年麥熟後分  
年帶徵次年應徵新賦緩至秋後徵收至本年  
應帶徵各年舊欠折價未完竈借口糧均請仍  
照原展分帶原案按年遞緩沿海災黎感沐

皇仁實無既極除飭確查丁溪等六場應賑極次貧  
竈戶口需用銀數併飭造具各場蠲緩錢糧銀  
數冊結另行照例辦理外謹會同江蘇巡撫

程祖洛合詞恭摺具

奏伏乞

皇上聖鑒謹

奏再查鹽場給賑向來多以本色折色併放本年被災較廣鹽義倉穀業已撥放各處接濟間有商欠應追之穀爲數無多不敷散給仍應照放折色約計共需銀數十萬兩在於運庫徵收正款內撥用俟事竣覈實造冊照例題報理合附片聲明伏乞

聖鑒謹

奏

道光十一年十月十六日具

奏十一月初八日奉到

硃批另有旨欽此同日奉到道光十一年十月二十

六日內閣奉

上諭陶澍奏勘明被災場竈請分別給賑蠲緩一摺  
本年江蘇省雨水成災淮南淮北各場竈或因湖  
河漫溢或因山水灌注兼以海潮頂漾場地被淹  
加恩著照所請其成災九分泰州分司所屬之丁  
谿草堰劉莊伍祐新興廟灣等六場准按照災分

查明極貧次貧戶口分別給賑折色散放併將該  
六場同成災五分之富安安豐梁垛東臺何垛等  
五場本年應徵折價錢糧按分蠲免蠲剩錢糧緩  
至次年麥熟後按照災分分年帶徵次年應徵新  
賦緩至秋後徵收本年應帶徵各年舊欠折價未  
完竈借口糧著照原展分帶原案按年遞緩其勘  
不成災通州分司所屬之餘西一場海州分司所  
屬之板浦中正臨興等三場本年應徵折價錢糧  
緩至次年麥熟後分年帶徵次年應徵新賦緩至  
秋後徵收至本年應帶徵各年舊欠折價未完竈

借口糧著照原展分帶原案按年遞緩又另片奏  
鹽場給賑向來多以本色折色併放本年被災較  
廣著照放折色所需銀兩准其在運庫徵收正款  
內撥用事竣覈實報銷該部知道欽此

恭報回省日期摺片

再回空軍船灌塘放渡已於十月十一日將首  
進幫船一千二百八十一隻全數灌塘趕緊起  
捻催令跟艚南下連日天氣嚴寒黃水遞見消  
落此後灌塘可期順利運河水勢充足堪資浮  
送不致有誤歸次信壩外越前經堵合因其挺  
入湖心恐致犯風已令跟澆後戩俾資鞏固其  
馬棚灣臨湖越堵壩工亦於本月十一日合龍  
後卽令趕壓大土一面估計東西各堤併善後  
事宜均經臣逐細籌商務期妥速另由河臣確



覈具

奏現在江寧藩司林則徐前赴被水災區勘辦撫  
賑事宜省城地方緊要臣卽於十七日自浦起  
程回省理合附片以

聞伏乞

聖鑒謹

奏

道光十一年十月十六日附片具

奏十一月初八日奉到

硃批覽欽此

巡江守備官兵遭風淹斃請照例卹賞摺子

奏爲巡江守備官兵遭風淹斃情形恭摺具

奏仰祈

聖鑒事頃接九江鎮總兵官施聯科呈據九江水師  
營把總李發春稟稱本營守備陳佐邦本年八  
月分輪應巡江會哨於八月初一日帶兵二十  
名呈請令箭坐船出巡於初九日戌刻巡至白  
水港江面陡遇暴風浪湧如山因黑夜水大力  
難救護將船打翻該守備陳佐邦及兵丁袁昌  
友時飛鵬王得何貴四名俱落水淹斃其餘兵

丁廖高等十六名皆鳧水登岸未致斃命隨即督同兵丁前往將守備陳佐邦併兵丁袁昌友等各屍身全行撈獲除陳佐邦所遺守備事務委令南湖水師營千總詹大雄往署理合呈報併據署德化縣知縣吳正緯勘明該處白水港卽係大江之中離郡城五里壞船處所距岸五六丈探量水深三丈餘淹斃各屍身俱經先後撈起據各親屬領回棺殮船泊岸邊蓬破繩斷篙櫓漂失提訊鳧水得生之兵丁廖高及船戶楊明善等供稱是夜委係陡遇暴風水深浪大

力難救護併無捍飾情事繪圖詳報等情併准撫臣吳光悅咨會前來臣查例載官兵出洋巡哨遭風漂沒身故者守備給銀三百兩加贈一級應得祭葬行文禮工二部議奏廕子弟一人以衛千總補用額外委馬兵給銀七十兩步兵給銀五十兩兵丁人等應給之銀如無妻子親屬承受者給銀二兩該督撫委官致祭又大洋大江黃河洞庭洪澤等湖危險地方凡官兵因公差委遭風漂沒身故者照議敘巡洋官兵淹斃之例辦理又內洋內河因公差委遭風受

困幸獲生全者兵丁人等照軍功二等傷例減半給銀十二兩五錢各等語今九江水師營守備陳佐邦輪值八月分巡江於八月初九日帶兵巡至白水港江面因黑夜陡遇暴風水大浪急致將船隻打翻與兵丁袁昌友等四名俱經落水淹斃其餘兵丁十六名覓水得生情堪憫惻覈與巡哨官兵在大江遭風漂沒身故及兵丁遭風受困幸獲生全議恤給銀之例相符除將該守備剗付另行咨部併飭營查明淹斃兵丁分別照例恤賞外所有守備及兵丁巡江淹

斃情形謹會同江西巡撫兼提督銜臣吳光悅  
合詞恭摺具

奏伏乞

皇上聖鑒勅部嚴議施行謹

奏

道光十一年十月十九日會

奏十一月十五日奉到

硃批該部議奏欽此

部議覆准

請酌留熟田漕米以資濟放摺子

奏爲江蘇省旗緣各營兵糧暨機匠幫丁米石因  
災短缺並崇明縣額定食米採買維艱循照成  
案

奏懇

天恩酌留熟田漕米以資濟放仰祈

聖鑒事竊照江寧司倉每年額放駐防旗兵糧米六  
萬四千九百餘石遇閏加增八千餘石綠營兵  
米八千六百餘石遇閏加增六百九十餘石又  
江寧織造局糧每歲額添兩項約需一萬二三

千石均係計口授食之需向在江寧府屬編解  
十分之七蘇松等屬暨安徽省協解十分之三  
本年江蘇被水成災業經臣等奏蒙

恩旨將應徵銀米分別蠲緩在案所有道光十二年  
分司倉兵米併織造機匠口糧以江藩司所屬  
編徵各縣災分計之約其缺米六萬石又上元  
江寧六合三縣應徵十年分漕屯等米因坐落  
本年災區尙有民欠未完八千三百五十餘石  
亦係撥解十一年分兵糧之用據各該縣具詳  
被災之後民情拮据未能依限徵完懇同新糧



一併照案展緩又淮揚各屬額支河漕狼山各標營兵米因災短缺約一萬三千餘石又江安糧道南撫米石併運減幫丁行月苦蓋等項約災缺米五萬石統計兵匠丁糧約其缺米十三萬餘石又蘇藩司所轄之崇明一縣四面環海地多斥鹵祇可種植棉花不能產米久經

奏定章程簽商給照分往鄰近各屬採買米三十萬石運回糶濟歲以爲常本年崇明屢被風潮成災較重更有乏食之虞該縣孤懸海外鄰省皆係災區勢難責令米商赴遠省採買而鄰

近各屬同係被災難爲挹注除設法零星購買  
外本年卽缺米二十五萬石計至明歲秋成爲  
日正長而春夏應買額米約需十八萬石卽使  
零星購買爲數亦斷無多以上各項通共缺米  
五十六萬餘石查本年江南各屬雖不至如江  
北被災之重而入秋以後風雨交加收成均爲  
歉薄米色尤難乾潔且冬麥未能盡種市糧價  
值日昂民食拮据又不獨在崇明一縣據署江  
寧藩司葆謙江蘇藩司梁章鉅江安糧道周繼  
忻蘇松糧道陶廷杰會詳籌請接濟等情前來

臣等伏查災缺兵匠等糧乾隆五十一年係動  
碾倉穀濟放嘉慶十九年係

奏動庫銀採買道光三年七年均係截留正緩漕  
米分別撥補九年十年係動撥緩漕支放其崇  
明縣食米乾隆四十六年於動撥倉穀碾米十  
萬石外併截漕十萬石接濟民食各在案是等  
補災缺米石除碾穀採買截漕三項而外更無  
他策然三者之中又必通盤覈筭因時制宜務  
期

國帑兵精民食各不相妨方爲有濟恭查道光七

年截漕案內欽奉

上諭此項災缺兵米例應於成熟地方發價採買今暫准借截漕糧嗣後不得援以爲例等因欽此此次自應欽遵前奉

諭旨以採買爲正辦但災年糧食昂貴一經採買市價倍騰卽如嘉慶十九年間買米四萬六千四百七十餘石卽已動用

帑銀至十九萬兩之多今年所缺兵匠等糧比之前屆數尤過倍

國家經費有常不敢不力籌樽節且本省與鄰封

被災俱重既恐購買無從而遠省價平之區運  
腳又多糜費前於被災之始人心惶惶曾經臣  
等

奏明借項委員前赴河南等省採買米麥原爲一  
時救濟之計迨陸續運回平糶實難免於虧折  
自應由臣等暨司道捐廉補足歸款若兵匠糧  
食例應作正開銷又非前項可比苟專顧額糧  
之支放而不計

帑項之多糜甚非臣等之所敢出也採買既毋庸  
議則碾動倉穀亦有成案可循因查道光十年

通官各屬應存穀數除已入二三次清查併歷  
年支給因糧出易平糶搭放賑濟外江藩司所  
屬應存穀一十一萬石有零蘇藩司所屬應存  
穀二十六萬石有零共應存穀三十七萬石有  
零以二穀一米計之僅可碾米十八萬餘石本  
不敷支給兵匠及接濟崇明之用且各屬自查  
報之後又閱一年不特因遞口糧例應隨時碾  
給卽因災平糶之處亦節經

奏明辦理雖現在尙未截數而覈之原貯穀數固  
已有絀無贏查倉穀爲儲備所關所有常年因

遞口糧必須源源支放而明年青黃不接之際  
仍不能不辦理平糶若全行碾動不復留餘則  
顧此失彼無異剜肉補瘡又非臣等之所敢議  
也兩者既皆難行則惟有仍照舊案酌畱熟田  
漕糧差爲無弊查今冬起運新漕除江安糧道  
所轄之饒省州縣額糧應歸安徽撫臣覈辦外  
所有江蘇通省熟田漕米約計尙有一百二三  
十萬石應請截留五十六萬石以爲旗綠各營  
兵糧併幫丁局匠等米及接濟崇明之用查兵  
丁局匠缺米十三萬石本應發銀採買今以正

漕抵撥於庫項不費絲毫應請作正開銷毋庸  
再議帶運其崇明縣本年及來年春夏應買食  
米四十三萬石卽以所畱漕米照時價發糶以  
濟該處民食所糶之銀自應解存司庫造報或  
卽撥還賑案覈銷容臣等再行察看據實  
奏辦亦毋庸另籌搭運如此酌量變通庫項不必  
動支漕糧仍得資實用似與議請截漕賑濟者  
情事迥不相同而功效歸於一致如蒙

皇上天恩俯允所請則災地軍民更可無虞失所感

戴



鴻施益無涯涘至歷屆緩徵漕米原係積歉之區本年又多因災遞緩卽江南各屬尙有應徵之處擬以抵放蘇藩司所屬災缺兵糧及蘇松糧道減徵幫丁月米之用合併聲明除分飭各司道將應撥州縣米石確數暨應減軍船分別議詳咨部外臣等謹會同署漕運總督臣吳邦慶合詞恭摺具

奏伏乞

皇上聖鑒訓示謹

奏

道光十一年十一月初七日具

癸十二月初八日奉到

硃批另有旨欽此同日奉到道光十一年十一月二十二日內閣奉

上諭陶澍等奏江蘇省旂綠各營兵糧暨機匠幫丁米石因災短缺併崇明縣額定食米採買維艱請酌留熟田漕米以資濟放一摺著戶部速議具奏欽此

戶部議奏等伏查食爲民天散賑出糶固屬救荒亟務而漕糧爲

天庾正供歲輔旂民口食所關亦不得不慎重覈計  
今據該督等奏開江寧旂綠各營兵糧并幫丁  
局匠等項共需米十三萬石由正漕內抵撥等  
語查前項應徵各米既經因災減缺此時發價  
採買轉恐糜費需時該省道光二年三年七年  
八年九年十一年兵米歷經災缺撥漕自數百  
石至十數萬石不等此次災缺應請照案准其  
照數借撥惟所稱作正開銷毋庸再議帶運之  
處查該省兵米歷雖借動均係徵完搭運道光  
七年該省截漕案內欽奉

上諭統俟各屬按限帶徵撥還搭運歸款等因欽此  
此次事同一律應令仍照成案帶徵搭運以實  
倉貯不得作正開銷至奏稱崇明縣本年及來  
年春夏民間應買食米共四十三萬石此時難  
以購買亦請照數截留以濟民食等語查該督  
原奏該縣本年只需食米二十五萬石現在卽  
使趕緊運往已屬緩不濟急災黎安能枵腹以  
待且每年採買鄰省米三十七萬石減半覈計  
本年秋冬亦不過用米十餘萬石已堪接濟其  
十八萬石乃明年春夏所需爲期尙寬似可招

商領買自行辦理查該省道光六年因米價昂貴曾奏截漕糧變糶米二十四萬餘石道光八年因挑漕劉河關係農田水利又奏截緩漕變糶米十二萬餘石亦從無指崇明一縣竟截漕至四十餘萬石之案所有此次本年應需民食擬請應准其先撥二十萬石按照時價運往發糶其二十三萬石應由該省自行採買或將蘇屬常平倉穀撥運接濟抑屆期實有嗷嗷待哺之處應令該督等再行奏明辦理至所稱糶出價銀解司造報或卽撥歸賑案發銷毋庸另籌

搭運之處查該省本年被災案內已發帑金百萬餘兩自有另案開銷卽撫卹不敷亦可據實聲請何得將此項變糶銀兩率請併入致與前案開銷銀數不符正爲屬員畱日後轆轤地步再查現在京通各倉存貯米石原屬寬裕足可暫爲挹注之資但

天庾積貯所關未便籌撥借而不籌歸補所有糶出米二十萬石價銀應令該督等提解司庫另款存貯不得絲毫動用仍於明歲秋成後察看情形發銀買補照數搭運或屆期毋須買補將價

銀解交部庫應請臨時由臣部覈議奏明辦理  
不准歸入賑案報銷總之該省辦理此案既請  
發帑又請截漕必須爲

國爲民通盤籌計兩有裨益方爲妥善乃該督等  
遞請撥用毋庸帶運是于京畿之

天庾民食未能從長計議且據稱採買賑糶難免虧  
折豈動用

國家正漕虧折轉可不計卽謂崇明縣地受風潮  
民力拮据前已將該縣被災情形籲懇賑濟在  
案而商船採買習以爲常當該省奏請委員分

投買米時卽應早爲一併計及發帑交商此時  
自己買回接濟若謂無款可籌查該省停挑劉  
河案內現有實存銀二十四萬餘兩儘可暫動  
歸補緩急輕重似未盡善所有此次統共撥給  
米三十三萬石務飭認真糶放實惠軍民不得  
任令該地方官冒濫侵漁致滋弊混又所稱常  
平倉穀一節係屬長年因遞口糧明春尙須出  
糶查常平倉專爲歲歉而設因糧乃係借用仍  
應隨時買補且爲數無多何至不能碾用况江  
寧所屬多係災區尙可藉口若蘇松所屬各州



縣照舊徵漕何以亦無倉穀碾用恐有虧挪不  
實情弊應併請令該督等欽遵前奉通飭整理  
常平倉穀

諭旨將該省各倉確切查明迅速報部覈辦如有虧  
短情事卽行從嚴劾奏倘稍含混臣部亦卽查  
叅以爲怠視倉貯者戒又所稱蘇藩司所屬災  
缺兵糧蘇松糧道所屬減歇幫丁月米尙須抵  
放之處何以不行併入聲請竟將另案開除總  
當先事預籌方免顧此失彼不得以片言敘入  
隨爲日後開銷之據應請俟該省報部到日再

爲覈實辦理等因奉

旨依議欽此

蕭縣龍山河宿州西流河挑挖完竣併請鼓勵

出力各員

總河蘇撫會稿

奏為挑挖蕭縣之龍山河宿州之西流河工程完竣照例開具丈尺銀數併請將在事出力各員量請

施恩鼓勵仰祈

聖鑒事竊照徐州府屬各河道因年久淤墊民田常被淹沒據前知府潘棟議請將府庫存貯節省開河經費一款酌撥動用次第挑辦當經前督臣蔣攸銑會摺

奏奉

諭旨擇其實在有益者分起接續辦理等因欽此嗣據該府詳稱徐屬河工惟蕭縣之龍山河最爲緊要應首先興辦經前任江寧藩司賀長齡委員前往會同前府潘樞督飭前署蕭縣張志遂等詣勘得該縣舊有龍山河一道自東門外古溝橋起至土型橋蕭宿交界止共工長一萬六百五十丈又順挑宿州境內工長五十丈共估土方銀一萬四千四百七十三兩七錢九分二釐旋據該府動支閘河銀款飭派原勘之主簿

屈嗣垣協防張成功前往分段挑挖仍飭前署  
縣張志遂督辦併委候補未入流李應麟候補  
巡檢許文極往來催工於道光十年二月初八  
日開工挑至第十一段任家臺迤下計工長八  
千九百丈共用銀一萬二千五百六十三兩九  
錢六分適值大雨停工經張志遂捐築土格九  
道以資欄束察看龍山河開挑水歸宿州歷靈  
壁五河等處達淮必須下游勢能容納方期妥  
善議俟秋後水涸再行勘辦嗣據宿州蕭縣會  
勘龍山河出水之道改從停工處之任家臺迤

下起直向西南由蔣家臺一帶挑至宿境西流  
河頭止共長二千五百丈內有宿州境內工長  
一千二百二十丈因工費無多議歸龍山河道  
併案挑辦估需土方銀三千六百五十六兩三  
錢一分七釐八毫連前工共需銀一萬六千二  
百二十兩二錢七分七釐八毫由徐州鳳陽二  
府覆勘稟報將蕭境工段飭令原委員弁於十  
年十一月初六日開工其宿州工段歸於蕭縣  
一手接挑併添委銅北主簿王裕挑辦於十一  
月二十二日開工均於十二月初六日一律照

估挑竣委據現任該管知府劉鴻翔親往驗收  
實係照估如式一律挑竣並無偷減草率所有  
該河挑過工長丈尺銀數據陞任江寧藩司林  
則徐前徐州道余需元開單會詳請

奏前來

臣

等覆查該河淤墊年久經各委員節次

履勘妥籌據估認真辦理工歸實在俾久經被  
淹之區從此可望豐收於農田水利實有裨益  
除飭造具估計冊結另行辦理外所有辦理各  
員相應籲請

恩施將督勘籌辦併捐築土格始終出力之前署蕭

縣候補知縣借補高郵州州同張志遂遇有沿  
河知縣缺出不論繁簡儘先補用勘估分挑出  
力之蕭縣主簿屈嗣垣儘先陞用催工出力之  
候補巡檢許文極候補未入流李應麟二員各  
照本班儘先補用其餘在工出力各員并由  
臣等分別酌獎記功註冊以示鼓勵所有龍山西  
流兩河挑工完竣各緣由  
臣等謹照例開具工  
長銀數清單合詞繕摺具

奏伏乞

皇上聖鑒謹



奏

謹將蕭縣挑過龍山河併下游宿州西流河工  
長丈尺銀數繕具清單恭呈

御覽

計開

龍山河一道自東門外古溝橋起至宿州境內  
西流河頭止共工長一萬一千四百丈估挑  
口寬一丈五尺至二丈七尺三丈五尺不等  
底寬七尺深二尺至三四五六七尺不等

共估需土方銀一萬六千二百二十兩二錢七

分七釐八毫

道光十一年十一月二十三日具

奏十二月二十四日奉到

硃批另有旨欽此同日奉到十二月十一日內閣奉  
上諭陶澍等奏挑挖河道工程完竣請鼓勵出力人  
員一摺江蘇蕭縣所屬之龍山河至宿州西流河  
一帶因年久淤墊民田淹浸前經勘估挑濬共需  
銀一萬六千二百二十兩零茲據該督等查明一  
律挑挖完竣並無草率偷減所有捐資及出力各  
員自應量予恩施前署蕭縣候補知縣借補高郵

川同張志遂著遇有沿河知縣缺出不論繁簡儘先補用蕭縣主簿屈嗣垣著儘先陞用候補巡檢許文極候補未人流李應麟著各按本班儘先補用該部知道欽此

淮南鹽務各口岸場地情形摺片

再淮鹽自三月開綱後旋值江水盛漲鹽船逆  
流而上挽運維艱至八九月來始陸續行抵楚  
西各境接據湖廣督臣盧坤來函漢岸已到鹽  
八萬餘引此外起運在途及已請將次起運者  
尙有四十萬引又據湖口縣稟報鹽船駛入江  
西境內已過二萬八千餘引此外起運在途者  
尙有二萬一千餘引現經派委員弁趕催赴岸  
俾得源源接濟至前請緩納一兩七錢之四十  
萬引商人已納初限課銀其二三限應完之課

正在趕辦應照案再爲展請引張俾課運蟬聯以應岸需至鹽船淹消只准補運不准免課原因向多捏報而設其實係遭風失險者亦不能不量爲矜卹查本年自湖北查出弊混數案據實懲辦現在淹消尙無捏報補運亦屬無多又楚西鹽價前此按照部價酌減二成係爲敵私起見近因口岸暢銷鹽價微有增長每包不過一二分尙可聽其自然毋庸官爲限制至各場私販鹽梟自本年三月七月兩次緝拿各匪嚴行懲辦以後回僞兇徒業已逃竄潛踪偶有私

販不過零星小夥竝無大股私梟緝捕尙易爲力臣仍嚴飭各營縣不稍鬆勁以靖地方此現在淮南趕辦引鹽及口岸場地之實在情形也惟淮北鹽務積疲已甚臣前與王鼎寶興會議章程時卽經聲明必須另行籌辦現委前任運司王鳳生前往該處查看情形相機整理俟辦有頭緒再令遵

旨前赴湖北趕辦水利堤工不致延悞合併附片陳明伏乞

聖鑒謹

奏

道光十一年十一月二十三日具

奏十二月二十四日奉到

硃批知道了欽此

江揚各屬成災五分以上額請一體緩徵捐子

蘇燕  
會稿

奏爲查明江揚各屬本年被水成災五分以上成  
熟村莊應徵錢糧一時未能完納恭懇

聖恩照例一體緩徵以紓民力事竊照江蘇省本年  
被水成災及勘不成災各處先經臣等會摺

奏請

恩施分別給賑蠲緩併聲明成災田地通境額田  
五分以上如須照例緩徵者查明專案詳辦仰

蒙



聖鑒在案茲據署江寧布政使葆謙轉據江寧府屬  
之上元江寧高淳揚州府屬之高郵泰州興化  
寶應等州縣先後稟詳該州縣本年夏間雨水  
過多江湖興漲河湖浸溢兼之堤工掣塌壩水  
下注各處田畝均被淹浸成災較廣以通境額  
田而計俱在五分以上所有鄰近成熟村庄應  
徵新舊銀米難以催輸應請援例一體緩徵等  
情由司覆查明確詳請具

奏前來臣等伏查定例成災五分以上州縣中之  
成熟鄉庄應徵錢糧准其一體緩至次年秋成

後啓徵又嘉慶十九年及道光三年六年江蘇各屬成災五分以上之熟田應徵錢糧亦經

奏准緩徵有案今上元江寧高淳高郵泰州興化寶應等七州縣被水較廣成災田地俱在通境額田五分以上其成熟村庄皆與災區毗連間有薄收僅堪消資口食若令完納糧賦民力實形拮据相應恭懇

聖恩俯准將上元江寧高淳高郵泰州興化寶應七州縣本年熟田應徵新舊錢糧照例緩至來歲秋成後再行改徵以紓民力除飭查造應緩款

冊另行咨部外謹合詞恭摺具

奏伏乞

皇上聖鑒訓示遵行

再海州沐陽清河三州縣例不給賑各鄉圖隆  
冬應否酌給口糧前經

奏明飭令道府確查辦理茲據該署藩司轉據道  
府查覆海州沐陽二州縣冬間尙可支持毋須  
酌給口糧其清河縣臨湖被淹之災壹圖吳伍  
圖懷壹圖泰安七鄉等鄉圖乏食貧民情形實  
形拮据併懇

聖恩今冬

賞給一月口糧以資接濟臣等於該司詳報時卽飭

趕查戶口所需銀兩卽於前次

奏撥賑款內動給俾令趕緊散放合併陳明謹

奏

道光十一年十一月二十七日具

奏正月初四日奉到

硃批另有旨欽此同日奉到道光十一年十二月十

六日內閣奉

上諭陶澍等奏江揚各屬成災五分以上成熟村庄

請一體緩徵一摺江蘇省上元等七州縣本年  
被水較廣成災田地俱在通境額田五分以上  
其成熟村庄皆與災區毗連間有薄收僅資口  
食若令完納糧賦民力實有未逮着照所請准  
將上元江寧高淳高郵泰州興化寶應七州縣  
本年熟田應徵新舊錢糧照例緩至來歲秋成  
後徵徵以紓民力其清河縣臨湖被淹之吳一  
圖吳五圖懷一圖泰安七鄉等鄉圖乏食貧民  
例不給賑現屆隆冬殊形拮据着加恩賞給一  
月口糧以資接濟所需銀兩卽於前次奏撥賑

款內動給該督等卽飭屬趕查戶口覈實散放  
刊發膳黃徧行曉諭務期實惠及民用副朕軫  
念災區至意該部知道欽此

續籌協撥賑需銀兩摺子

蘇撫會稿

奏爲續籌協撥銀兩以濟賑需仰祈

聖鑒事竊照本年江蘇省被災地方既重且廣荷蒙  
皇上天恩先行給予撫卹旋經臣等查明各屬成災  
分數

奏奉

恩准分別給賑併准戶部咨覆蘇省藩道各庫准其  
酌留銀一百四十餘萬兩俟辦有頭緒如果不  
敷再請籌款撥用等因臣等先因戶口尙未查  
明不能覈出實用銀數未敢遞行續請迨

奏定章程之後督飭印委各員覈實挨查票必親  
填人必面驗查完一戶立即書其門首查完一  
村復經榜示通衢併飭司道府州分投抽查悉  
心稽覈臣因審辦案件駐劄揚州密加查訪各  
屬尙知凜畏實力奉行惟查本年應賑地方至  
二十六州縣衛之多前次准撥之項除蘇藩司  
所屬

奏明酌留四十萬兩備用外江藩司所屬災重之  
處較蘇屬不啻倍蓰前款

奏撥銀一百餘萬兩業已儘數陸續撥發計將來



撥實用數餘割無多轉瞬來春展賑急應預爲籌備據江寧藩司趙盛奎詳請續撥接濟前來臣等伏查道光六年被災二十餘州縣共用週展賑口糧銀五十六萬餘兩本年被災情形較之六年尤重且各屬積水未能全涸種麥半已無及十月以來湖水忽又驟長民間沿湖所種之夏苗莖蔬又已悉被淹沒來春展賑銀兩更應廣爲儲備計應籌撥銀六十萬兩現在蘇藩司所屬備用之四十萬兩除崇明等縣賑務應用外計尙有盈餘銀二十萬兩應請卽撥入江

寧藩庫備用尙不敷銀四十萬兩相應恭懇

聖恩俯准勅部卽將本省之龍江許墅二關存撥銀兩全行扣畱併在附近之九江關暨浙省藩關各庫內查明堪撥之數連龍江許墅二關共合銀四十萬兩迅速解交江寧藩庫以濟急需如有用剩銀兩卽行

奏明提歸報撥臣等仍督率所屬覈實辦理倘官吏人等有侵尅虛冒情弊立即嚴叅重辦不敢稍事姑容以期仰副

聖主軫恤災黎有加無已至意除咨明戶部外謹合

詞恭摺由驛具

奏伏乞

皇上聖鑒訓示謹

奏

道光十一年十二月初三日具

奏十二月十九日奉到

硃批戶部速議具奏欽此戶部議臣等伏查江蘇江

寧等屬本年被災應需撫賑口糧銀兩先據該督等請將蘇省藩道各庫存貯正項及捐監漕價各款共銀一百三萬餘兩奏留備用此外尙

多不敷請將浙江藩關各庫堪撥銀兩暫行扣  
留經臣部奏准將蘇屬藩道各庫銀兩准其留  
備賑需其請留浙藩關各庫銀兩議令除該督  
等候辦有成緒如果實有不敷另請籌款撥用  
在案今據奏稱前次奏撥銀一百餘萬兩業已  
儘數陸續撥發來春展賑計應籌備銀六十萬  
兩除將蘇州藩司所屬賑剩銀二十萬兩撥入  
江寧藩庫備用外尙不敷銀四十萬兩請將本  
省之龍江蕲壁二關存撥銀兩全行扣留並在  
附近之九江關暨浙省藩關各庫內查明堪撥

之數連龍江許墅二關共銀四十萬兩迅速解  
交江寧藩庫以濟急需臣等查係籌備展賑要  
需悉心酌議擬撥九江關稅銀五萬兩蕪湖關  
稅銀九萬兩鳳陽關稅銀八萬兩龍江西新關  
稅銀六萬兩許墅關稅銀四萬兩江海關稅銀  
四萬兩淮安關稅銀三萬兩揚州關稅銀一萬  
兩以上共撥銀四十萬兩應令各該撫監督等  
於文到日迅卽派委委員解赴江寧藩庫備用  
仍責成該督撫於屆辦展賑之期董率所屬實  
心經理并隨時嚴密稽查倘官吏等有侵尅冒

濫情弊立即嚴叅究辦如有賑剩銀兩亦即提  
歸報部撥用等因奉

旨依議欽此

上元等州縣衛來春應請接濟摺子

蘇撫會稿

奏爲遵

旨查明上元等州縣衛來春應請接濟緣由恭摺覆  
奏仰祈

聖鑒事竊照道光十一年十月十一日承准軍機大  
臣字寄道光十一年十月初三日奉

上諭江南海州沭陽縣積水上元甘泉等十九州縣  
揚州衛被淹崇明靖江二縣被風被淹武進等七  
州縣被水海門廳通州被風來春應否接濟之處  
查明於封印前奏到等因欽此仰見

皇上軫念災黎有加無已之至意當經恭錄轉行欽  
遵查辦去後茲據江寧布政使趙盛奎蘇州布  
政使梁章鉅查明各州廳縣衛來春應需接濟  
情形請

奏前來臣等伏查江蘇省本年各州廳縣衛被水  
成災及勘不成災情形業經奏奉

恩旨蠲緩錢糧分別給賑茲復荷蒙

特諭垂詢臣等細加體察惟江寧府屬之上元江寧  
句容溧水高淳江浦六合鎮江府屬之丹陽淮  
安府屬之山陽阜寧桃源鹽城揚州府屬之高



郵泰州東臺江都甘泉儀徵興化寶應通州屬  
之泰興等共二十一州縣及淮安大河揚州三  
衛成災被淹田地積水尙未全消二麥不能佈  
種且多係積歉之區戶鮮蓋藏來春青黃不接  
之時民力不免拮据相應恭懇

天恩俯准將上元江寧句容溧水高淳江浦六合丹  
陽山陽阜寧桃源鹽城高郵泰州東臺江都甘  
泉儀徵興化寶應泰興等二十一州縣及淮安  
大河揚州三衛坐落各縣屯田成災十分九分  
八分七分併六分災極貧乏食軍民

賞給一月口糧俾資接濟感沐

鴻慈益無既極此外江藩司屬之海門廳蘇藩司屬之靖江丹徒崇明等縣雖均成災現在勸捐義賑接濟毋庸查辦至成災五分之海州沐陽等屬暨勘不成災之武進等屬飭據該司等查覆或平糶常平倉穀或紳捐義賑穀石現在情形均可毋庸接濟統俟來春察看情形如有無力佃農應需酌借籽種口糧及出易糶濟之處臨時再行查辦所有查明上元等州縣衛來春應需接濟緣由謹合詞恭摺具

奏伏乞

皇上聖鑒訓示謹

奏

道光十一年十二月初三日具

奏道光十二年正月初五日奉到

硃批另有旨欽此同日奉到道光十一年十二月十

九日內閣奉

上諭本年江蘇省城各州廳縣衛被水業經降旨蠲  
緩錢糧分別給賑小民自可無虞失所朕念來春  
青黃不接之時災區戶鮮蓋藏有需接濟復降旨

令該督撫等體察情形具奏茲據陶澍等查明奏  
請恩施該處積水未消被災較重自應先春布澤  
早沛恩膏著加恩將上元江寧句容溧水高淳江  
浦六合丹陽山陽阜寧桃源鹽城高郵泰州東臺  
江都甘泉儀徵興化寶應泰興等二十一州縣及  
淮安大河揚州三衛坐落各縣屯田成災十分九  
分八分七分併六分災極貧乏食軍民賞給一月  
口糧俾資接濟該督等卽刊刻謄黃徧行曉諭務  
令民沾實惠以副朕軫念災黎有加無已至意該  
部卽遵諭行欽此

知州因公墜馬身故請卹摺片

蘇撫會稿

再海州地當海濱界連東省淮北鹽場悉在州境爲梟徒出沒素稱難治之區該州知州謝肇瀛到任以來緝捕極爲認真地方賴以整頓往往身先兵捕奮勇直前不辭勞瘁本年十一月初六日該員聞州境與山東郟城縣交界之桃林地方有梟匪竄匿卽夤夜親自往捕當獲李苟王十子二名乘馬折回因山路崎嶇馬岔受驚該員墜馬跌傷吐血內損擡回醫治無效於十二日因傷身故殊堪矜憫查定例官員歿於

王事者如因公差委遭風漂沒等事均得邀  
恩贈恤今海州知州謝肇瀛緝拏梟匪墜馬身故實  
屬因公歿於王事合無仰懇

勅下部議卹之處出自

皇上天恩再所遺海州員缺查有卸署揚河通判事  
尙未回任之甘泉縣知縣鍾承露幹練有爲任  
勞任怨堪以委令署理除劄飭遵照外合併陳  
明 臣等謹合詞附片具

奏伏乞

聖鑒訓示謹

奏

道光十一年十二月初三日附片具

奏十二年正月初五日奉到

硃批另有旨欽此同日奉到道光十一年十二月十九日內閣奉

上諭陶澍等奏知州捕匪墜馬因傷身故懇恩勅部議恤等語江蘇海州知州謝肇瀛緝捕認真到任以來地方整頓該州境因有梟匪竄匿該員卽夙夜往捕獲犯折回山路崎嶇馬驚墜跌以致傷重身故殊堪矜憫該員事屬因公自應賜恤惟與歿

於王事者微有區別著該部查覈定擬具奏欽此

道光十二年正月二十一日准

吏部覆稱查定例官員因公差委在內洋內河漂沒者減等贖贖又定例知州贈知府銜各等語今江蘇海州知州謝華瀛因州境有梟匪竄匿該員往捕獲犯折回馬驚墜跌以致傷重身故經兩江總督奏請議恤欽奉

諭旨吏部查覈定議具奏應請將該故員照內洋內河漂沒例加贈知府銜該員因緝捕獲犯折回山路崎嶇墜馬身故與歿於王事者微有區別



應毋庸給廢其應得減等卹賞祭葬各項銀兩  
俟

命下之日臣部移咨禮兵工各部照例辦理應給贈  
銜

請命揭送內閣撰給等因奉  
旨依議欽此

通泰海所屬被水各場籲請展賑摺子

奏爲查明兩淮通泰海所屬被水各場來春應需接濟懇

恩分別展賑給予一月口糧仰祈

聖鑒事承准軍機大臣字寄道光十一年十月初三日奉

上諭本年江南富安等場積水經該督奏到已加恩分別蠲緩散放口糧諒可不致失所惟念來春青黃不接之時民力不免拮据著傳諭該督體察情形如有應需接濟之處卽查明據實覆奏務於封

印前奏到候朕於新正降旨加恩等因欽此 臣跪  
讀之下仰見

聖主厪念災黎

恩施優渥之至意當卽恭錄轉行鹽運使欽遵查明  
具詳去後茲據署兩淮鹽運使俞德淵詳據泰  
州分司運判朱沆查得丁谿草堰劉莊伍祐新  
興廟灣六場被水成災九分現在積水雖已漸  
退埽蕩被淹日久二麥難以播種來春青黃不  
接窮竈不免拮据應請無分極次貧竈概行展  
賑一月口糧又富安安豐梁垛東臺何垛五場

被水成災五分水退較遲難以播種二麥來春  
青黃不接竈力實有未逮應請給予一月口糧  
又據海州分司運判張若鏞查得板浦中正臨  
興三場被水勘不成災惟積水雖退尙須整理  
池面方能起晒時已冬月冬竈仍屬停工別無  
恒業委屬生計維艱難以糊口來春青黃不接  
應請給予一月口糧又據邳州分司運判章復  
文查得餘西一場猝被風潮勘不成災惟本年  
潮水上漫蕩草秋收歉薄竈丁倍形困苦來春  
青黃不接亦請給予一月口糧以資接濟而紓

竈力各等情呈請具

奏前來

臣

查各該場或湖河漫溢或山水匯注或

海潮頂漾致受淹浸前經

奏奉

恩旨分別給賑蠲緩惟水退較遲竈丁口食無資係屬實在情形合無仰懇

皇上天恩俯准將成災九分泰州分司所屬之丁谿草堰劉莊伍祐新興廟灣六場無分極次貧竈來春糧行展賑一月折色口糧銀兩其成災五分之富安安豐梁垛東臺何垛五場同勘不成

災海州分司所屬之板浦中正臨興三場通州  
分司所屬之餘西一場皆係積歉之區本年被  
災較廣糧價增昂雖成災僅止五分及勘不成  
災而竈情困乏異乎尋常應均懇於來春

賞給一月折色口糧俾濱海災黎藉資接濟仰沐

皇仁益無旣極除飭運司查明被災戶口應用銀數

咨部查覈外

臣

謹會同江蘇巡撫

臣

程祖洛合

詞恭摺具

奏伏乞

皇上聖鑒謹

奏

道光十一年十二月初八日具

奏道光十二年正月初五日奉到

硃批另有旨欽此同日奉到道光十一年十二月二十二日內閣奉

上諭本年江南富安等場被水業經降旨分別蠲緩賑卹小民自可無虞失所朕念來春青黃不接之時濱海災黎有需接濟復降旨令該督等體察情形具奏茲據陶澍查明奏請恩施該處積水未消被災較重自應先春布澤早沛恩膏著加恩將成

災九分泰州分司所屬之丁溪草堰劉莊伍祐新  
興廟灣六場無分極次貧竈來春概行展賑一月  
折色口糧銀兩其成災五分之富安安豐梁垛東  
臺何垛五場同勘不成災海州分司所屬之板浦  
中正臨興三場通州分司所屬之餘西一場均著  
於來春賞給一月折色口糧俾資接濟該督卽刊  
刻曉諭備行曉諭務令均沾實惠以副朕軫念災  
區病瘼在抱至意該部卽遵諭行欽此



覆奏條陳鹽務應請仍守成法摺子

奏爲遵

旨票議鹽務條陳各件通盤籌畫恭摺覆

奏仰祈

聖鑒事竊

臣

節次承准軍機大臣字寄欽奉

諭旨將侍講學士顧藎奏請課歸場竈光祿寺卿梁

中靖請就場收稅各一摺

飭交

臣

悉心籌畫核議具奏又前後遞到大僕寺少

卿卓秉恬請仿照王守仁贛關立厰抽稅一摺

江西巡撫吳光悅請撤商歸竈徵其課稅一摺

均奉

旨交

臣與湖廣江蘇江西湖北安徽河南各督撫悉

心妥議具奏各等因

臣查諸

臣所請變通鹽法

其說不一皆主於化梟爲良無官無私立意誠

爲甚善惟

臣

再四籌畫通盤合計仍有未敢遽

議更張者兩淮鹽課甚重三倍於江蘇全省之

錢糧非通秦海一隅之場地所能歸入若徵之

於鹽則沿海窮民家無長物卽謂鹽歸丁賣不

患其貧而一池一鐵獲利幾何豈能以數百萬

之鉅款散而責以完納若欲就場收稅則又弊

竇易滋蓋鹽之爲物與布帛菽粟同功而不同  
用布帛菽粟隨處所有成本重而課稅輕然且  
不免於透漏若鹽在場竈每觔僅值制錢一二  
文一經收稅則價隨課長爭其利者必多海濱  
廣斥民竈雜處池以掃鹽凡有箕帚者皆可掃  
繳以前煎鹽凡有鍋竈者亦可煎將比戶皆私課  
稅且因之而更紂至於設廠抽稅或可小試於  
一隅若行之於各省則與就場設官徵稅之法  
地不同而流弊同緣各省道路四通八達凡鹽  
所從入之地安必處處皆有隘可守繞越漏私

轉恐比場竈爲更甚總之無官無私必須無課  
無稅而後可業經有稅有課卽屬有官有私如  
謂一歸場竈一設鹽販卽可上裕

國帑而化梟爲良竊恐有所未能且此數說者皆  
本於唐臣劉晏聽其所之之一語故諸臣皆以  
爲化梟之良策其實劉晏權鹽卽今商運之法  
所謂亭戶糶商人是也晏建常平鹽倉數千商  
運不至則減價以糶置巡院十三以捕私鹽姦  
盜爲之衰息是晏恐遠省缺鹽及商竈漏私已  
於聽其所之之先大有布置竝非僅聽其所之

而遂能化梟爲良也且妄當日係總天下之鹽而權之故能聽其所之今則某省食某處之鹽各有口岸若淮鹽任其所之必至南侵浙閩北侵蘆潞兩淮未收其利而他省已受其害矣倘因此遂改天下之鹽法盡歸於場竈則紛更愈甚關係愈大利權不操於上必移於下恐豪強兼併之徒得據爲利其患有甚於私梟者是以上年冬間臣與尙書王鼎等通盤籌酌業將課歸場竈及就場收稅種種窒礙之處詳細聲明會同具

矣在案至分地銷鹽課歸商辦原係

國家成法第因日久弊生浮費愈增而愈多錢糧亦愈加而愈重卽如每年應解之帑利七十餘萬其借本早罄於前人彼時釐務猶堪敷衍又有此一千餘萬之借本供其揮霍是以中枵而仍能粉飾於外今則各項竭蹶無本可借而轉須爲前人償債其利息此外節省之款又有四十餘萬而亦係沿襲於昔年而加徵於此日以救負重難勝沈痼從此而甚臣於萬難措手之時力求補救自接印以來疏通積引懲辦私梟

現據湖廣督臣由稱漢岸舊鹽銷完新鹽業已  
開秤卽糧船水手素稱强悍而本年回空亦未  
敢仍前夾帶倘再能多辦新引似可望漸有轉  
機無如自三月開綱以來始而章程初定商情  
不無觀望繼而被水成災場竈又多漫淹加以  
商本乏竭力能辦運者不過十數家設法支持  
勉強接濟此等情形總緣從前之受病太深故  
此日之復原非易也臣自維愚昧實不敢謂計  
出萬全惟有殫精竭慮認真督辦併札催運司  
諭飭各商乘此旺銷之時設法趕運俟本綱限

滿之後倘能得有起色則

本朝二百年來之成法卽無庸另議更張萬一無  
可挽回再行據實奏明另行籌辦總期於釐務  
實有裨益斷不敢稍有成見亦不敢推諉卸責  
謹

聖主委任之至意所有臣通盤籌畫鹽務悉心計議  
緣由理合恭摺具

奏伏乞

皇上聖鑒謹

奏



道光十一年十二月初八日具

奏十二年正月初五日奉到

硃批另有旨欽此

淮北請試行票鹽摺片

再淮南商力雖疲然自開綱以來尙捆運至五十餘萬引淮北則止捆二萬餘引較定額不及十分之一實屬疲憊已久臣前與尙書王鼎等會議時卽經聲請另行籌辦本年奏准借動帶運殘鹽課銀二十萬兩將官收窰鹽督商辦運均係擇其暢銷之岸先行運往以冀早將庫項收回而滯岸仍無鹽濟售民間旣無官鹽不得不買向民販窰丁積有餘鹽亦不能不賣與民販臣體察情形擬將暢岸仍歸商運其餘滯岸

卽仿照山東浙江票引兼行之法於海州所屬  
之中正板浦臨興三場分設行店聽小民投行  
購買運往售賣擇各場要隘之地設立稅局給  
以照票註明觔數及運往何處售賣字樣凡無  
票及越境者仍以私論如此通融辦理俾遠丁  
民販皆獲有生計而所收稅銀又可補正課之  
不足臣非摺後卽札行運司妥議條款酌量試  
行如果行之有裨再當漸次推廣設使行之不  
便亦不難於停止理合附片聲明伏乞

聖鑒謹

奏

道光十一年十二月初八日具

奏正月初五日奉到

硃批另有旨欽此同日奉到道光十一年十二月二十二日內閣奉

上諭陶澍奏開綱以來淮北祇捆二萬餘引較定額不及十分之一本年將官收竈鹽督商辦運均擇暢銷之岸先行運往以冀早收庫項而滯岸仍無鹽濟售民間既無官鹽不得不買向民販竈丁積有餘鹽亦不得不賣與民販等語著照所請淮北

暢岸仍歸商運其餘滯岸卽仿照山東浙江票引兼行之法於海州所屬之中正板浦臨興三場分設行店聽民投行購買運往售賣擇各場要隘之地設立稅局給以照票註明勛數及運往何處字樣凡無票及越境者仍以私論著陶澍卽飭運司妥議條款酌量試行該部知道欽此

江西贛州請試行設廠收稅併留委員摺片  
再江西引鹽滯銷實由粵私侵佔最甚贛縣之  
攸鎮地方粵省開設子店熬鍋日增日多全行  
衝銷淮地而梟匪亦因以聚集興販曾經

奏明會勘地界多年迄未定議現今撫臣吳光悅

既以贛州一帶地瘠民貧人情蠻野稍有資本  
者多藉鹽爲生計自係實在情形與其堵緝無  
效任其侵銷或竟因時制宜援照明臣王守仁  
之法於贛州淮粵交界之地設廠凡粵鹽之衝  
入者卽照淮課之數收稅卽以其稅撥補淮綱

之引課似亦商民兩便但須於贛州收進一步  
地方勘明有可攔截之隘口設卡堵截如粵鹽  
再進仍作私論否則愈佔愈進縱使收稅可以  
補課而淮南所產之鹽又無去路竈丁生計何  
資不可不籌計萬全江西係臣兼轄地方但臣  
現因公事繁多一時未能親往而地勢情形又  
難懸揣應請

勅下江西撫

臣

吳光悅就近切實確勘地界廣爲察

訪可否設厰試行妥切籌議辦理江西旣議設  
厰抽稅則履勘形勢覈定章程必須熟諳之員

方資差委查有原任贛州府知府陳煦在江西  
年久於贛州府任內緝私督銷最爲出力熟悉  
淮粵界址情形該員現在起復來江例應赴部  
候選合無仰懇

聖恩俯准將該員陳煦留於江西隨同撫臣辦理鹽  
務實於公事有益合併附片陳明請

旨謹

奏

道光十一年十二月初八日具

奏十二年正月初五日奉到



硃批另有旨欽此同日奉到道光十一年十二月二十二日內閣奉

上諭陶澍奏江西引鹽滯銷實由粵私侵佔贛縣攸鎮地方粵省開設子店熬鍋日增全行衝銷淮地請援照王守仁之法於贛州淮粵交界之地設廠凡粵鹽之衝入者照淮課之數收稅卽以其稅撥補淮綱之引課須於贛州收進一步地方勘明有可攔截之隘口設卡堵截如粵鹽再進仍作私論等語著江西巡撫吳光悅就近切實確勘地界廣爲察訪可否設廠試行妥切籌議辦理江西旣議

設轍抽稅必須熟諳之員履勘形勢核定章程原  
任贛州府知府陳煦緝私督銷頗爲出力該員現  
已起復著照所請准其畱於江西交吳光悅差委  
辦理鹽務該部知道欽此